

B. N. C.
FIRENZE
1033
17







UNIVERSITY OF
OXFORD
ORNT ADVI
DE MATHEMATICAL
LIBRARY



NICOLAI ADIVNCTII
BVRGENSIS
ORATIO
DE MATHEMATICAE
LA V D I B V S

*Habita in florentissima Pisarum Academia
cum ibidem publicam illius scientiæ expli-
cationem aggressurus foret.*

AD SERENISSIMVM
FERDINANDVM II.
MAGNVN ETRVRIAE DVCEM V.



ROMAE, Ex Typographia Iacobi Mascardi. MDCXXVII.
SVPERIORVM PERMISSV.

Imprimatur si videbitur Reuerendiss. P. M. Sac. Pal. Apost.

A. Episc. Hierac. Vicefg.

Imprimatur ,

**Fr. Paulus Palumbara Socius Reuerendiss. P. Sac. Pal. Apost. Mag.
Ord. Prædicatorum.**



3 — II

SERENISSIMO FERDINANDO II.

MAGNO ETRVRIAE DVCI V.

MARCVS ANTONIVS PIERALLVS
in Pisana Vniuersitate Collegij Ducalis Modera-
tor, & publicus Iuris fori pœnitentialis
professor Fel. prec.



RATIONEM *banc de laudibus Geo-*
metriae (Serenissime Princeps) scripsit
Nicolaus Adiunctius Mathematicas suas
praefationes in Pisana Academia auspica-
turus; Eam autem consuetudini & tem-
pore inseruiens, multis circumcisam mem-
bris, ac praecipuis spoliata ornamentis
palam habere coactus est. At enim exigua
illa pars, cui tunc audientium corona & plausus non defuit, miram
totius orationis legenda in omnibus excitauit cupiditatem; Verum
quod à plerisque ingenij obtinet ostentatio, non potuit ab Oratoris
modestia commune desiderium, & vis amicitiae extorquere. Nu-
per verò cum Romam mei negotij causa me contulissem, atque
apud Amplissimum Praesulem Ioannem Ciampolum commorarer,
ibi quò docti omnes confluunt, & à meliori Apolline Musa omnes
bilari hospitalitate exceptae recreantur, sapè rogatus fui, cur hanc
orationem non dum publici iuris fecisset Adiunctius, cur meliorum
artium amatores adeò longa expectatione torqueret. Dedit ille
tandem manus de tam benignis questibus admonitus, ne modestiam
suos labores paruifacientem verteret in superbiam aliorum iudi-
cia damnantem, atque etiam sperans se eorum patrocinio muni-
tum iri, quorum consilio obtemperasset. Ergo statim orationem

publicis descriptam typis in fama lucem eduxi, qui meas partes esse arbitror & bique gloriam augere Pisani Collegij, cui à sapientia nomen, à Medicea beneficentia praesidium est; Eius enim tu, optime Princeps, beneficio olim Adiunctus alumnus, ego nunc Moderator existo. Perfectum planè haecenus est tam elegantis eloquij vi, ut complures ad Geometriae studia animum adiunxerint: perficietur absque dubio ut tuus in Ducale id Collegium fauor augeatur; patet enim quam felix ibi germinet Medicea liberalitatis semina, ubi tam suaves proveniunt fructus eruditionis & ingenij. Eam igitur Serenissima Celsitudini Tua pluribus nominibus debitam nuncupare decreui, tum quia mathematicas disciplinas effert viro Principe dignas, quibus tu regia indolis & sublimia meditantis animi adolescens summopere delectaris: tum quia opus est lectissimi iuuenis tuis auspicijs, beneficijque inter Etruriae plaudentis laudes ad gloriae immortalitatem properantis. Iam verò eruditis hisce lucubrationibus beneficam Solis lucem admovere felicius non possum, quam eas glorioso Serenissimi Ferdinandi nomine illustrans; Tam feliciter enim triumphas in benevolentia populorum, ut te regnante sceptrum Etrusci principatus subditae gentes amore, exteræ nationes plausu, barbari hostes timore, Viri principes laudibus, Europa uniuersa festis acclamationibus, & faustis ominibus colat: Accipe igitur Serenissime Princeps libenti animo, atque hilari vultu eruditum hoc tributum magni ingenij tuis laudibus florentis, à quo multarum virtutum feraci, non modo Mathematicorum oracula, sed etiam Virgilij carmina & Ciceronis eloquentiam Etruria expectat. Porro autem meam obseruantiam suae auctoritati, tuaque beneficentia debitam, optato patrocinijs tui honore ne dedigneris. Ego interim Deum Opt. Max. orabo, ut tibi Nestoreæ prudentia adulescenti Nestoreos annos commodet ad praesidium Etruria, atque ornamentum Italia. Roma xix. Kal. Septemb. MDCXXVII.

ORATIO³



ECTE¹ sanè, vt cætera omnia (dignitate, sapientia, studio præstantissimi Auditores) providentissimus rerum Opifex id effecit, vt quamuis humanum genus vniuersum consimili, & eiusdem compaginis corpore conformaretur, sua tamè cuique ineffent oris lineamenta, suus color, sua effigies, sua partium habitudo, quibus singuli à singulis dignoscerentur: nam si vna omnibus esset simillima, & quasi ad speculum geminata imago, humanum turbaretur commercium, atque inter viuendum inobseruabili luderemur errore; sed non extrinsecas modo corporum species variare, verumetiam animorum imagines dispartire, nec eandem omnibus mentem voluntatemq. donare, longe maiorem attulit vtilitatem; vt enim hæc artium doctrinarumq. varietas excogitaretur, vt magnis vitæ commodis atque ornamentis, quæ alia in aliud propensa ingenia nobis compararunt frueremur, fuere varia mentium pensæ viritim distribuenda, & propria cuiusque animi incitamenta singulatim adigenda. Ergo meus quoque animus Aud. suum habet aculeum, suoque asilo extimulatur; si verò quæritis quis me agat genius, & ad quid pronius serar, sic habetote. Maiora viribus aggredi, non meo me modulo metiri, non pro opibus mœnia facere, sed supra memet consurgere, & pennas nido maiores extendere mea propensio est, vt in me olim dictum iure quispiam dicere possit, aut viribus adde, aut animis detrahe; at ego neque me recudere possum, neque ex ingenio meo migrare; sic homo sum; cum quid animo occurrit (dummodo præclarum speciosumq. illud sit) si meas vires excedere agnosco, tum verò cupidius accendor, illic vsque ex vnguiculis perprurisco, vt assequar omnem lapidem moueo, nihilq. est quod ardentius concu-

concupiscam: quem animi mei morbum cum frequenter ab incunte ætate licuit mihi persentiscere, tum hodie postremo meo temere facto manifestè deprehendi. Quid enim arrogantius, aut confidentius fieri potuit, quam me non nisi leuicula, quadam ingenij volucritate præditum, & in omni studiorum genere ante hac desultoria leuitate errabundum, nec dum in vno aliquo grauius pressis firmatisq. vestigijs constantem, vellem tamen huius florētissimæ Academiæ subsellia conscendere, & grauissimas Mathematicarum disciplinas de superiori loco profiteri? Hæc ego omnia perbene expenderam, & diu mecum animo reputaueram quanti negotij esset dignum hoc theatro spectaculum dare; sed vellem nollem naturæ obtemperandum fuit, quam vt ait Lyricus, licet expellas furca tamen vsque recurrit: Vrebat me dies noctesq. huius loci amor, nec me destitit vrgere, incendere, instigare vsque adeò donec perpulit vt hanc aleam subirem, & munus hoc efflagitarem, quod cum mihi vel nimis obsecundantis fortunæ indulgentia, vel nimis honorifica de me virorum principum opinione contigerit, superi saltem meum inceptum adiuuent ne voti subscriptio vergat in existimationis iacturam, & bos existimer in argentea quadra. Vos verò Auditores quo pacto leonum truculentiam, luporum ingluuiem, ceruorum timiditatem non indignaremini, ita nec meæ temeritati succensere debetis. Non ego meis me sinxi manibus, & nulla sine amico numine mens bona est; quæcunque autem nos siue bona siue mala appellamus certis cuncta constant nutibus ac momentis, & ad imperiosum præpotentis naturæ arbitrium gubernantur. Ad hæc accedit quod meum non inexpressibile peccatum est, sed cura adhibita elui potest, atque ad bonam frugem reuocari. Etenim quemadmodum quædam virtutes in vitia degenerant, sic interdum vitia in virtutem euadunt; hanc ob causam fax dicitur virtutis gloriæ cupiditas, austera tetricitas parit seueram innocentiam, atque iram fortitudinis cotem sapientes vocitarunt. Sic ego quoque operam dabo, vt meus hic præceps nimisq. audax conatus sit mihi demum honesti laboris necessitas, sit nauæ industriæ con-

contentio, & non infrugifera sedulitatis exercitatio. Vires omnes aduocabo, atque omni ope contendam, ut quam provinciam audacter animosèq. suscepi aliqua cum dignitate retineam; quod me consecuturum facile confido dummodo benigni Caelites, quos semper admota manu inuocabo præferuidæ voluntati opitulentur. nolo hic vobis de me magna & eximia polliceri, sed cum in rem præsentem ibimus, quid pertinax studium, quid iuuenilis alacritas præstare possit apertissimè cognoscetis. Nunc aliò cogitationes vestras auocabo, & quem fauorem mea tenuitate demereri non possum, iucundioris orationis argumento mihi conciliabo. Hoc quod superest temporis spatio ex vberimis, ac numerosis Mathematicæ laudibus cursum nonnulla perstringere, ac vobis delibanda proponere decreui, quod breuiter sine pompa faciam, & sine adipali opulentia orationis; hoc enim mihi propositum est non ad satieta-tem vos infarcire, sed tantummodo gustum vellicare. Nolim, verò, quoniā valde copiosam fœcundamque materiam nactus sum aliquis vestrum in me ingerat, Eris videlicet sine controuersia disertus; non ita res se se habet, quinimo (aut ego fallor) quanto res laudabilior & ornatu dignior est, tanto difficilius pro dignitate exornari potest, & debita orationis maiestate condecorari. Si autem, quod olim Antalcidas cuidam encomium Herculis apud Spartanos recituro, idem mihi Mathematicas laudaturo obijciatis, Quis illas vituperat? illico respondebo, per quam multi; siquidem steriliter aut præpostere laudare, non laus est, sed obtrectatio, & parcus obscurusq. laudator (si Phauorino credimus) aperto detractore iniquior est. Ecquis non stomachetur ineptissimas atque ignobiles laudes quas scioli quidam præclaræ huic tribuunt facultati? qui ut se quoque pro Geometris venditent, turrium & puteorum altitudinem, agrorum superficiem, locorum situs ac positiones tantummodo metiri Mathematicæ artis medullam opinantur, atque scientiam spatia terrarum oceaniq. fluctus peragrantem, cuius imperium vsque ad flammantia astrorum mœnia propagatur sinibus adeò angustis ignobilibusq. concludunt. id pro-
fecto

fecto nihil aliud est, quam si dicerent Plasticae ollis ac trullis affabrè fingendis inuentam esse: & ideo Pythagoram musicae modulos diligenter exquisuisse, vt posset pastor pascentes in sole pecudes multifora buxo oblectare. O ridicula & leuissima capita! ò deliri & fanatici homines, atque eadem illà quà agros metiuntur pertica metiendi. Et tamen isti vulgo approbant sua deliramenta, quia scilicet paucissimi sunt harum rerum studiosi, & boni Geometrae, vt olim boni principes omnes in vno anulo sculpi possent. Sed has camentariorum viliumque opificum circumforaneas & compitalitias laudes naucificiendas, nec inter triumphalia Geometriae decora enumerandas censeo. Veras ego & solidas eius laudes asseram, & suis illam coloribus expressam repraesentabo. Ac primo quidem illud impaudè affirmare, & constantissimè asseuerare non dubito, Nihil homini esse aptius acutissimæque eius intelligentiae conuenientius Geometrica speculatione; maius adhuc dicam, & veritati magis consentaneum, ceteræ omnes præter hanc disciplinae aut nullæ sunt, aut ex hoc fonte promanant. Non vereor, ne non hanc à vobis exprimam licet inuidiosam, tamen certissimam veritatem. Astrorum terrarumque orbem cogitatione peruagimini, versatilem hanc rerum vniuersitatem animo perlustretis, ex his rebus omnibus, quarum species sensuum ministerio ad animum peruadunt, quid nos habemus, quid percipimus præter motus, colores, numeros, ac figuras? nihil profecto. Si ergo vllius rei notitiam consequi velimus, ad hæc omnino mentem conuertere opus fuerit, & super his dum taxat ingenium agitare; sed sola Geometria hæc curiosè contemplatur, & sagacissimè peruestigat. Quicumque igitur aliquid (quantum inter humana licet) pernoscere, & de eo scienter, doctèque disputare velit, ad geometrica perfugiat necesse est; quare vna Geometria nos in rerum notitiam perducit, & sola complectitur studia vniuersa. Quàm verò hominis propria sit ex eo conijcite, quod vt homini tantum erectus est ad sidera vultus, ita illi tantum animus ad veritatis indagationem excitatur: & soli homines inter ceteros animantes (vt Plato exi-

stima-

stimauit, numeros teneat, sine quibus Mathematica omnis euerteretur, ac pessum iret. Quamobrem veteres cum hominem plumbeo ingenio, & pecudi magis quam homini similem designare voluerant *αἰνυμένειος* nuncupabāt; Socraticus autē Aristippus ad Rhodiensium litus naufragio ciectus, postquam in littore geometrica schemata inspexit gaudio exiliens clamitauit ad comites, Bonum habeatis animum, ne desperetis vestigia hominis animaduerto. Coniectabat vir sapiens homines in proximo degere, non quia pedum pressiones passim arenoso lictore adaectas (hæc enim ambulantium non hominum vestigia sunt) sed quia mathematicas descriptiones conspicabatur. Quod si hæc vobis vera quidem, sed nimis subtiliter inquirentis, remque acrius persequentis iudicij argumenta videantur, hoc idem clarius ac euidentius commostrabo, & planiorem ingressus viam perspicue docebo, omnes artes in Mathematicæ studio suas scatebras concepisse, atque inde deductas & ad humanos vsus corriuatas defluxisse, omnem vero morum suauitatem, omnem humanioris vitæ expolitionem non aliunde ortum duxisse apertissima oratione comprobabo.

Quid enim (vt hinc potissimum exordiar) homines in specubus perfossisq. rupibus ferarum more delitescentes ab agresti illa atque inculta horriditate, intra domos ad mansuetæ consuetudinis societatem perduxit, nisi Mathematica Architecturæ magistra & institutrix? Hæc docuit commodas domorum partitiones, aptasq. commodulationes præfinire, vt sint ædificationes ad speciem decoræ, ad vsum commodæ, ad vetustatem diuturnæ, ad valetudinem salutare, atque his domiciliorum extructionibus paulatim amabiles conuictus, coetus, viciniae, oppida, vrbes coaluere, inde vero lena & conciliatrice natura, mutui affinitatum nexus, cognationum iura, societatum fœdera, necessitudinum vincula profecta sunt, donec posita intraçtabili atque agresti illa rusticitate, hominum ingenia sensim ad humanitatem mansuefacta, & mitiori cultu condocesa gradatim per cæteras artes progredientes, ad hanc excultissimæ vitæ elegantiam peruenerunt. Et quis adeo hebes ac

lusciosus est, qui semel hanc mundissimam viuendi lautitiem, comptissimamq. concinnitatem contemplatus, non continuo intelligat tantum inter prima illa infantis naturæ rudimenta, & nostras hasce absolutissimas artium perfectiones, inter siluestre illum impexumq. satiriscorum non hominum squalorem, & nostrum hunc elegantem vitæ nitorem interesse, quantum inter lutum & gemmas, inter fruges & glandes, inter belluas denique atque homines? Conferte obsecro Afrorum angusta mapalia, contexta ramalibus viminumq. lentore impleta, cum nostratibus peramplis egregijsq. structuris, quæ cœmentitijs lateritijs lapideisve parietibus extructæ, & crebris contignationibus coaxatæ percommodas efficiunt habitationes: conferte Massagetarum lustra cœcaque latibula cum Romanis vestibulis, cauedijs, peristilijs, atrijs, pavimentis, laquearibus, ambulationum laxamentis, cæterisq. omnibus ad augustæ maiestatis decorem splendidissime exædificatis: comparate quadratas Colchorum turriculas alternis trabibus iugumentatas, cum quadratis saxorum molibus, pilisq. marmoreis editissimis hodie operibus in mirandam altitudinem excitatis: postremo fictiles Maxiliensium casulas subactâ paleis terrâ concretas, & Phrygiorum tumulos media fossura exinanitos, superne vero stipitibus inter se religatis, lutoq. inducto solidatis in metam stramentis, vluq. palustri contactam desinentes, comparate cum faberrima huius temporis ædificandi ratione; an non illius tempestatis homines nobis collatos talpas, mures, cuniculos, testudinesq. lutarias iudicetis? Neque solum priuatas respexit domorum fabricatione vtilitates Mathematica architectatrix, sed & publica opera quantas habent opportunitates? vt basilicæ, porticus, balnea, fora, theatra, viarum munitiones, expeditæ & faciles ad urbem mercium commodationes, aut per portus marinæ subuectiones. Quam vero publice vtilis & salubres pontes, fontes, aquæ ductus, & in urbem subterraneis riuis arcuatis operibus plumbatisq. canalibus aquarum perductiones, iustæq. in singulos erogationes? quid murorum præiunctiones, firmissimæq. urbium munimenta?

Nonne

Nonne ijs pax, quies, securitas populi custoditur? Nonne ijs publica salus continetur? Quomodo inundantem ad oppida, funestanda hostilem barbariem propulsaremus, quomodo infestissimæ dominandi cupiditati resisteremus, quomodo sanguinarias quasdam belluas & immanissimorum latronum sceleratos impetus retunderemus, quomodo agros à vastatione, oppida à solitudine, domos à direptione, populum ab exitio, & postrema calamitate tutaremur, nisi nobis inexpugnabile sepimentum circumvallare, præcipites fossas circumducere, præcellos aggeres circummoliri, munitissimas arces, & propugnaculorum solidissimas structuras facere in comunem salutem, vigilantissima excubatrix militaris Architectura demonstrasset? Quid templorum erectiones & dedicatæ cœlicolis magnificentissimæ ædes? Cœlites ipsos lætari magnopere arbitror quod suorum numinum excelsitas non plane indignis tanto fastigio augustalibus in terra recipiatur, quibus & diuinitatis maiestas pro humanis viribus adumbratur & incussa mortalibus Diuum religiosa veneratio illorum verendas & formidabiles ostentat potestates. Atque hæc omnia tantopere æstimanda, & tanti commodi tantique operis ardua molimenta, vnà eaque perexigua Mathematica pars suppeditauit.

Nunc & in alijs plurimis quantum cæteris suis partibus præstiterit adiumentum videamus. Tecta ædificasse atque vrbes condidisse non satis fuit, sed vt coaliti conuentus firmiter hærent, mutuis operis fuit comune commodum sustentandum, & varia rerum procuratione, multisq. artium adminiculis vita nauiter ingenioseque tuenda. Inde opificum multiplex prodijt industria, & blandiente priuati compendij spe, qua illecebra, ad laborem homines mirifice inescantur omnigenæ artes factitatæ, & in dies magis magisque gliscente lucri cupiditate ad exquisitam solertiam perducta sunt opificia vniuersa. Inter quæ primas obtinuit partes mercatura; hæc enim cæteris artibus materiem, atque alimenta præbens, fora, emporia, officinas copiose instructas reddit, annonæ abundantiam, frugum copiam, bonorum omnium affluentissimā vbertatem administrat,

egregia textrina & lanificij opera ad cultū corporis, vestiumq. ornatum vndique congestat, vinarias, olearias, lanariasque tabernas suis refertas mercibus coaceruat, ea demum omnia, quibus indigemus, quibus vti frui vesci ornari possumus longinquas regiones peragrans vnde vnde quæritat, & in vrbes prouidentissima opulentia curat asportandas. Hanc vero ipsam quæ fieri posset, vt sine dispendio exerceremus, quæue vnamquam indigenis cum alienigenis mercatoribus sine turbis, ac litibus commercia intercessissent, nisi nobis rationes colligendi, subducendi, multiplicandi, partiendi certas præceptiones & compendiaras regulas Aritmetica tradidisset? Turbulentæ & plenæ rixarum essent negotiationes, non accepti & expensi ratio congrueret, nomina præpostere conturbarentur suaque ineptia & incitia mercatores decoquerent ac decollarent: nunc vero numerandi peritia cauti homines ephemerides, & rationarios codices conscribunt, nomina quæ ritè ac liquidè disposita apparent pro eo ac ius fasque postulat, nunc referunt, nunc dispungunt, & clare peruident an sūma quadret, an quid excurrat: prouentus & impendia annua ad teruncium norunt; in re nummaria versuras facere, pecunias commutare, nummos vacuos fœnore occupare, & ex vsuris quantū sorti accesserit ad minutas vsque dinumerare supputatorijs calculis perdidicerunt; in mercibus autē diuendundis, permutandis, nundinandis mercatores vt cū maxime supputandi peritos, & calculi celeritate sine lapsu expeditos, valdeq. exercitatos esse necesse est; ita enim dū merces distrahunt, varieq. agitant detrimenta, intertrimenta considerant, portoria, præteruectiones, vectigalia deducunt è lucro, & bene putatis rationibus quæstiosa negocia inceptantes priuatam rem augent, & publicæ consulunt vtilitati. Quamquam in hac parte non vna mercatoribus Aritmetica necessaria est, sed vt remotissimis in regionibus transmarina mercimonia nundinentur, opus fuit maritima quadam Architectura, quæ mathematico illo mirabili inuento ostenderet nauium fabricationem, doceretque contestis trabibus carinæ aluum coagmentare, abiegnis statuminibus, veluti

veluti costis latera suppingere, & stupeo tomento pice
 interlito commissuras veluti artus ferruminare¹, mox verò ve-
 lis, remisq. armare, & clauo veluti habena quadam infrenare
 ligneum equum, quo, vt ait Plautus, per caruleas vias veheren-
 tur; præterea Mathematicorum quoque geographicæ, hydro-
 graphicæq. descriptiones, locorum intercapedines quasi digito
 commonstrantes requiruntur, quarum adiumento ad nos cre-
 tica vina, erithrææ gemmæ, Sabæ messes, odoramenta, medi-
 camenta plurima transuectantur, dumque illi maria præterna-
 uigantes velificante avaritia periclitantur, nos sexcentis vitæ
 fruimur hilaritatibus, delicijs, atque ornamentis, alienis, exte-
 risque ex orbibus per longinqua, & periculosa itinera compor-
 tatis. Mercatura igitur inferiorum artium nutrix; victus pe-
 nuarium, rerumq. omnium promptuarium, Mathematica adiu-
 uante in vsum producta cœpit exerceri. Iam verò reliquas ar-
 tes si singulatim percensere velim, & quantum Mathematicæ
 debeant demonstrare, oratio in immensum excresceret, & vos
 meritò superuacuum prolixitatem fastidiretis. Vt ergo omnes
 vno verbo comprehendam, summamq. perstringam, dicite
 amabo auditores ecquotaqueque ars nō vitur trutina, regula,
 norma, circino, & perpendiculo? quodnam opificium non sal-
 tem suum opus absoluit numero, pondere, & mensura? Ecquot
 verò artificum, fabrorumq. necessaria instrumenta machinalis
 Matheseos scientia fabricauit? vt præla, trapeta, torcularia,
 versatiles, trusatiles molas, pistorias, textorias machinas, plau-
 stra, aratra, rhedas, cisia, tornos. Quot verò communia plerif-
 que artibus opportunissima armamenta machinatrix Mathe-
 matica comparauit? cuiusmodi sunt vectes, trocleæ, ergatæ,
 succulæ, terebræ, & sexcenta id genus, interquæ nō nulla reper-
 ta sunt, quæ non solum vehementer viles, sed & prodigiosos,
 ac miraculo proximos pepererunt effectus, vt Dædali Siracusij.
 trispastum, quo admota tantum manu læua septemmillia mo-
 diorum attrahebat; & eiusdem Archimedis ingeniosa machi-
 natio cochlij, quo Nili annuo incremento stagnantes lacunas
 exsiccauit, totumque Aegyptum lurulentis in scrobibus iacen-

tem alleuauit: sed & Archimedæa helica, non ne magnum ingenij ostentum iudicetur? cum huius tantum Organi applicita contentione ingens, vastæque molis nauigium in mare detrussit. In obsidione verò Syracusarum mirificus idem artifex machinarius non solum balistæ, scorpionis, catapultæ, commensuratis ictibus Marcelli classem impetebat, conuulnerabatque, & vineas, sambucas, pluteos, testudines, aliasque machinas arietantes lapidum subita, nec prouidenda tempestate labefactabat, vel laxatis repente pendentium saxorum libramentis immani verberare contundebat, sed & alia tormenta plurima, aliasque tentauit propugnandis mænibus molitiones, quarum præter ceteras illa fuit maximè hostibus infesta, & perniciosa, quam Titus Liuius tollenonem appellat. Transuersa erat antenna, præalto stipiti arrectario media sui parte versabili momento introacta, cuius illa extremitas quæ intra mœnia dirigebatur plumbea massa, velut ingenti sacomate prægrauabatur; altera verò parte, quæ extra mœnia prominens exporrigebatur, religati catenis harpagones, ferreæque manus dependebant, quas ubi tempus accommodè inciderat, hostili proræ iniiciebant, apprehensamque nauim, postquam tumultuaria versatione diu rotatam, iactatam, agitaram diu exauerant, vel proximis illis scopulis malè quasauerant, remissis subito ductarijs funibus, & plumbi massa pessum ruente. Nauis abrepra in puppi sustollebatur, deinde schæsteriæ artis clandestino ministerio solutis catenis in mare nauis cum horrida classiariorum trepidatione præceps deferabatur; & siue in os, siue in latus procumberet, merfabatur, siue recta vndis affligeretur, vehementiore illisu, non modicas aquas recipiebat; quare Marcus in Archimedis artem, quamuis ægro animo iocatus tamen dicebat, suas naues Archimedis esse trullas, ac situlas, quibus aquam hauriret. Sunt verò & complura alia aliorum ingeniosa machinamenta, quæ ad frequentes, nec leues vsus accommodantur. Vt ad hortorum rigationem; ad sentinas exhauriendas, ad portus repurgandos antliæ, siphones, hauatoria timpana multigenæ inuentionis; ad librationes aquarum, decursusque

cursusque illarum examinandos, ac moderandos, chorobates,
 dioptræ, aquariæ libræ multiplicis artificij: ad aquas altissimè
 sub tollendas, & incendia restinguenda hydroscopica Ctesibij
 tuba; ad ve grandia onera subuectanda Ctesiphontis inuentum,
 quo ille vsus scaporum libera versatione non sarracorum rotis,
 quæ campestri mollitudine vorabantur còlumnas Ephesum ad
 Dianæ templum ex lapicidinis deportauit. Ad diei verò tem-
 pus designandum, ad negotia, hominumque opera partienda,
 ad vitæ nostræ mensuram quandam, quam multiplici horolo-
 giorum constructione nobis Mathematica præsto fuit? Habe-
 mus Arinillas, Annulos, Quadrantes: habemus Berosi Chal-
 dæi Hemicyclium, Aristarchi Samij scaphem, Scopæ Siracusij
 Plinthium, siue lacunar, Eudoxi Arachnem, Dionysopori co-
 num, Apollinij pharètram; neque solum gnomonicis umbris, &
 analemmatos descriptione solaria horologia construuntur, sed
 & rotarum tereti volumine, iustoque grauantium ponderum,
 descensu publicæ illæ turrium maiores horariæ machinæ fabri-
 cantur, & priuatis commodis viatoriæ, pensilesque machinulæ,
 quæ suis denticulatis rotulis, flexilibusque lamellis circum actæ
 indice ligula, sonoriq. malleoli attemperatis ictibus horarum
 interualla metiuntur. Innumera denique sunt machinamenta
 instrumenta, subsidia, inuenta, quibus à Mathematica artes
 omnes insigniter adiuuantur, ad vberriimos fructus promouen-
 tur, & sine quibus opificia omnia manca, mutila, clauda corrue-
 rent, & frustra sese erigere conarentur. Attamen parum id mi-
 hi esse videretur artes omnes mathematicis ortas seminibus, &
 manum porrigente Geometrâ surrexisse, nisi ipsa gubernatrix,
 & tutela artium humani consortij propagatrix iuris, legumque
 scientia Mathematicis niteretur fundamentis. Cùm verò le-
 gum scientiam nomino, non de illa loquor rabularum altrice
 obstrepera, & ad rauim clamorosa altercatrice, quæ togatos vul-
 turios, & forenses hirundines pascit; non de illa, quæ intra sub-
 fellia, & magistratuum cancellos leguleis, vilibusque caufidi-
 cis præuaricantibus, colludentibus, in lites coëuntibus spolijs
 ciuium ludit, & conductitiæ vocis concertationem, ac styli ven-
 ditiarij

ditarij faculariam operam exercet; non de illa, quæ auro
 clientes emungens ciuilis discordiæ vndantia athena despumat,
 atque interim nouam æstus, feruorisque materiẽ suggerit co-
 stis, non inquam hanc dico edacem flammam iustitiæ nouer-
 cam, litium seminarium, cauillamentorum fruticetum, grassa-
 torum syluam; sed illam virtutum aram, innocentie arcem,
 animorum conciliatricem, contentionum extirpatricem, iusti-
 tiæ præsidem inuiolabilem, inadulterabilem, incorruptam,
 quam A. Gellio referente, Stoicus Chrysippus pingi solitam
 dixit virginem quandam illibatam, aspectu vehementi, lumine
 acri, cum toruitate lenem, cum seueritate clementem; illam
 denique intelligo siue Græcorum Thêmin, siue Hesiœdi Di-
 cen, siue Nemesein, siue Astreã; & sacrosanctam Louis filiam,
 quæ in elementis, & natura vniuersa vis est quædam coagmen-
 tans, & rerum omnium temperamentum; inter homines autem
 est mutue charitatis vinculum, pietatis origo, vrbium guber-
 naculum, & vitæ, morumque moderamen. Hæc igitur quo-
 modo iusti, atque iniusti arbitra suum illud geminum munus
 conuenientis distributionis, & legitimæ commutationis ritẽ
 obire possit Mathematis ignara, atque imperita? Quandoqui-
 dem ius distribuendi Geometrica, communionem verò com-
 merciariã Arithmetica proportionẽ regi, ac gubernari Aristot-
 eles, & plerique ciuilis sapietie Antistites affirmauerunt. Quid
 verò familie heriscundæ, finium regundorum, & de communi
 diuidendo frequentes, ac tumultuosæ controuersiæ? quomodo
 dirimerentur? nisi Geometria suam interponeret doctrinam,
 atque auctoritatem, & decretorio stylo semel litigia profliga-
 ret? Ac ne multis vos morer reuocetis obsecro in mentem, &
 memoria intueamini ipsa iustitiæ idola, & simulacra, quæ scul-
 pturis, aut picturis expressa, quotidie oculis incurrunt. Quod
 nam enim Aстреa gestamen manu præfert, & quasi iustitiæ sim-
 bolum ostentat, nisi geminis lancibus pendulam libram? At li-
 bra præcipuum est fundamentum, & primarium Mechanicæ
 instrumentum, ad quod cætera omnia instrumentorum genera
 reuocantur; Mechanica verò pars est Mathematicæ, eaque
 valde

valde nobilis, atque abstrusa. Quare quemadmodum nemo, nisi Mathematicus rectè intelligit quid faciat lances æquatis nutibus æquiponderantes, & qua ratione in stateris, ac trutinis pondera reciprocis appensa distantijs æquibrentur; ita prorsus nemo potuerit Iustitiæ libram ancipiti examine suspendere; & poenas, & crimina æqua lance rependere, & virtutis, & præmij æquipondia facere, nisi Mathematicis sacris, & Mechanicis arcanis ante fuerit initiatus. Quapropter extra omnem dubitationis nubeculam vos perspicuè videre arbitror Mathematicam non solum pedissequis, & ancillantibus artibus auxilio esse, sed ipsi artium dominæ, ac moderatrici magnum præbere fulcimentum. Verumenimvero quoniam ex artibus, hominumque studijs alia vtilitatem maximè spectant, & ad vitam, necessarios vsus, alia potius in dulcibus animi alleuamentis, & innocuis sensuum oblectamentis operam consummant; nos verò hæcenus superiori oratione commemorauimus illa, quæ vtilitati præcipuè student, nunc illa etiam, quæ animi exhilarationi, suauique iucunditati consulunt, videamus: etenim, certò scio vos hic quoque planissimè, perspecturos Mathematicam esse ingeniosarum omnium voluptatum architectam. Ac primo quidem si primogenitam Ideæ filiam pingendi artem, animaduertamus, quæ fucata, & pigmentata specie nobis illudens blandissima oculis, miranda animis, naturæ inuidiosa, spectacula exhibet, quid illa profectò est, nisi vera, & genuina Mathematicæ pars, quæ alio nomine Perspectiua nuncupatur? hæc opticæ pyramidis inuenta sectione pro rebus imagines offert, & fidelibus oculis fallens præstigijs dolosa veritate nobis imponit; atque hæc ipsa est, quæ regit delineantem pictoris manum, & ostendit quomodo à pupilla ad rem visam pertinentes radij demissum ob oculos transpicuum velum (quod sectionis tabulam, seu parietem vocant) intersecantes, suis describant interfectionibus apparentes figuras, & quomodo oculi supernè, infernè, ex aduerso, ex obliquo, è longinquo, ex proximo coniecti in obiectas formas, dispares, dissimiles, & pro situs ratione diuersa diuersè constitutas in obtento velamine figu-

ras intueantur. Hæc etiam superreflusa lucis primarios fulgores, variosque repercussus considerans, & definitas umbrarum projectiones sciographicis præceptis circumscribens illud præstat, ut pictura suos habeat recessus, atque eminentias, & figuræ omnes lumine, tonio, umbra, distinctæ, dilutiore, intensiore colore depictæ, circa versuras, & delineationes extremas ambitu paulatim euanido effugientes, viuida vndecunque expressione efficacissimè compareant, atque è tabula se se efferre quodammodo videantur. In traga diarum verò, & comæ diarum scenicis apparatibus theatrales illos ouantis populi stupores sola scenographia optica alumna publicauit. Ex huius enim præscriptionibus, ac regulis eruta primum ab Aeschilo, deinde à Democrito, & Anaxagora pulchra illa ratio describendæ scenæ, quæ hodierno quoque tempore non ignoratur; nam puncto quodam constituto veluti centro, à quo acies, oculique iubar in varia obiecta coniectum diradiatur, per linearum concursus scenarum imagines representamus, & exiguo spatio editissima palatia, fulta columnis atria, per amplas porticus, perpetuos domorum ordines, viarum longissimas directiones, & veluti remotissimos prospectus in presenti tabula simulamus, & quàmvis picturæ planis, equalibusque frontibus sint inductæ, tamen alia velut abscedentia reconduntur, alia veluti promiuentia exporriguntur. Neque hoc loco silentio prætere possum aliam apprimè incundam Perspectivæ partem, quæ Catoptrica siue specularia nuncupatur: hæc ab speculis planis, sphericis, conicis, columnaribus, vel concavis, vel convexis pròdeuntes imagines speculando triplicis visus nempe directi reflexi, refracti fallacias aperit, atque hallucinationes, & diuersis reflexionum, refractionumque elisionibus animaduersis facile comperit, cur Sole aduerso discolores Iridis arcus Cælo appareant, cur tremulo splendore micantia sidera rutilent, cur interdum sol geminetur, cur feræ cometarum flamme intorqueant comas, cur circa Solem, & Lunam aduentitiæ lucis temporarij fulgores oboriantur, & complura huiusmodi ex suis causis declarat, quæ alioqui ignarum vulgus terrificæ percellunt

cellunt admiratione . præterea Catoptrica artificio quædam efficiuntur, quæ ab harum rerum imperitis excitæ potius magicis exantationibus, sagarumque susurris laruales cæcædæmonum ludificationes, & inania terricula, quam reconditæ artis miracula iudicarentur; cuiusmodi est ære volitantia spectra oculis offerre; & pellucidulas quasdam, vanasque imagunculas, veluti monogrammos illos, & transpicuos Epicuri Deos digito commostrare, ac manibus contrectandos obiectare . Sic etiam unicam hominis formã in tricorporis Geryonis, vel centugemini Briarei speciem transformare, & pusilla corpora ad colossicam proceritatem, & ad giganteos artus dilatare, vel etiam contra proceras, ingentesque staturas hominum ad brevicula salicippia, & minuscula sigilla coarctare, itemque ludicra illa, & circulatoria, sed pulcherrima spectacula, illæ inquam eruscatorum fenestratæ capsulæ, pluteiue lusorij, quibus si caput indideris idonea speculorum circumacta inclinatione multiplici, vel parulis consita arboribus amoenissima viridaria, vel structæ acies, & innumera oberrantium simulacrorum agmina oculis obuersari videntur; Et veterum monumentis toties decantata Archimedis specula Solis radios in igneam pyramidem cogentia, cœlestique admota flammæ ratēs hostium quamuis multum aquoris interiaceret Phæronteo correptas incendio comburentia: quæ quidem omnia vnus speculariæ artis vix credenda prodigia commendantur . Veruntamen hisce superius expositis (pace dixerim vetustatis) quam longissimè præstat, & multis nominibus antecellit nuperrimum illud catoptrica speculationis opus, quod geminis cristalli orbiculis altero concavo, conuexo altero, oblongo tubulo insertis adornatur, & vulgo Telescopium, vel Galilei Perspicillum vocitatur . Quid enim admirabilius, quid iucundius, quid præstantius humani vnquam ingenij acerrima audacia conata est, quam velle longissimo quoque dissita interuallo, & pluribus etiam passuum millibus distantia corpora tam clarè, & distinctè inter noscere ex ea longinquitate, quam si sub ipsis oculis præsentia proponerentur? Id meherculè transactis omnibus æuis non.

solum inusitatum, ignotum, inauditum fuit, sed furor visus
 fuisset, & insania mera tale quidpiam concupiscere, vel me-
 ditari: at enim hoc ipsum tam rarum, tam incredibile, tam sin-
 gulare magna quadam hodiernae tempestatis prerogatiua nobis
 contigisse oculatis quotidie experimentis manifestum habemus,
 & quisquis oculis admouerit telescopium, quascunq. res visas
 (quod monstri simile est) centuplo, quingentuplo, millecuplo
 maiores sentit augeri, quodque magis est, illarum species ita
 minutatim, scrupulosèque distinguit, ut trigecuplo vel etiam
 quadrigecuplo viciniore appropinquare videantur, quam si
 nudis oculis, & libera acie spectarentur. Quapropter hoc in-
 strumento non solum oculorum acies vegetata, & ad naturae
 opera intuenda acrior facta, sed & Philosophia, & Astronomia
 vehementer innouata, mendacijs omnibus spoliata, & illustrio-
 ribus argumentis confirmata est. Veteres Astronomi licet
 Atlantem, & Olimpum ascenderent, tamen ad coelum perui-
 dendum caligabant, & hallucinabundis similes cecutiebant.
 Nunc verò coelum ipsum contēplamur, & deducto amotoque
 (ut ita dixerim) sipario, aulaeque tragico admirabiles stellarum
 versatiles scenae aperiuntur. Huius optici organi opera corni-
 culatam Veneris faciem, Saturnum auriculatum, Lunam mon-
 tanis asperitatibus, confragosam suspicimus, viam lacteam
 sydereis emblemate vermiculatam agnoscimus; propter hoc
 sydereos habemus nuncios, & de totius etheris reipublicae sta-
 tu certiores facti sumus: hac adhibità ferulà nouus Florentiae
 Prometheus maculis in Solē compertis Phæbeum iubar immi-
 nuit: hoc indice coelorum thesauri resezati, & quatuor illis sy-
 deribus idest aeternū coruscantibus gemmis magni Cosmi dia-
 dema irradiatū est: hoc interprete Medicei Heroes ad cōgressū
 Iouis admissi, & sempiterno aeu dignati Diuū immortalīū con-
 cilijs interesse meruerunt: hoc denique non tantum orbi terra-
 rū, sed coelo, & syderibus ipsis longè notissimus etruscus Atlas
 Galileus, cuius astriferis humeris coeleste Astronomiae pon-
 dus, omnisque sydereae compago aptissimè sedet & valentissi-
 me fulcitur; animis omnium mirificam voluptatem, oculis om-
 nium

nium claritatem, suo nōmini æternam lucem; nostræque Etruriæ peperit immortalitatem. Sed maioris ne ego tantum Telescopij laudes commemorabo, & eiusdem Galilei Microtelescopium tacitus præteribo? Nonne huius etiam lepida, arguta, atque utilis voluptas est? In pusillis ac minutulis animalculorum corpusculis acutissima naturæ solertia quam maximè elucebat, verùm isthæc ante effugiebant nostram imbecillam, aciem oculorum, qui ad hæc tenuissimi operis faberrimas subtilitates inspicendas fatiscebant; dudum vero Telescopioli vsu ita sensum visus exacuimus, vt quarumcunq. bestiarum articulos omnes & membratim minima quæque oculis vsurpemus, & lynceolo hoc ocellulo in insectis, vagini pennibus, terræque intestinis hamatos, vel bifurculos vnguiculos, hirsutula cruscule, forficulata rostellæ, discolores, versicoloresque aluo procursum, reticulata lumina, totam denique speciem cunctanter rimamur, omnemque configurationem peratente, acriterque considerantes incredibili perfundimur voluptate: quæ sanè admirabilis, subtilis, & diuini propemodum ingenij plena est, vt sola perpetuum vberimæ orationis argumentum mereatur: mihi tamen hac parte diutius immorandum non est, quoniam aliæ quoque complures scitissimæ voluptates Mathematicis conquisitæ, & conditæ artibus, quæ nollent illaudatæ prætermitti me aliò reuocant: maxime verò suis blandissimis illecebris flexanimæque vocis lenocinio me illecebrat innoxia illa syren Musicæ artifex, canendique magistra, qua mellifluum hilaritatis nectar ægris animis instillatur, cuius tanta vis est, ac potestas, vt turbatos, iactatosque animos componere, & tranquillare, sedatos rursus, pacatosque in rabiem agere, & limphaticis penè furoribus extimulare possit. id quod olim Magnus Alexander expertus est cum Antigonide incitatis, præferuidisque modulis toto artis impetu canente ita impotenter actus repente arma corripuit, vt in amicos circa accumbentes iam iamque exalbescences infestum propemodum distrinxerit mucronem; quapropter non multò post Aristonico Cytharædo inter pugnandum extincto statuam æream poni iussit altera,

manu

manu cytharam retinentem, altera verò prætenta lancea præliantisque gestu minitantem, nimirum ut ostenderet Musicæ arte bellicam virtutem inflammari, sopitamque pectoris ferociam excitari. Ex quo venit hoc loco mihi in mentem, quàm fortè ob causam hominis animam nonnulli sapientum quandam esse armoniam existimarint. Etenim quemadmodum si quis in cythara quocunque fides pulsauerit, statim chordæ omnes, quæ cum prioribus illis aliquo consonantiæ interuallo conueniunt, tremulo reuibratæ percussu sonum edunt; ita prorsus in animo, harmonicis fidium, cantusque modulationibus consoni affectus expergiscuntur. Doria modulatio, quæ stabili, grauis, & plena dignitatis est animis insinuat grauitatem, & ad Catonis supercilium nos componit. Lydia, næniæ, lugubresque moduli mœrore animum obducunt, & tristissima ægritudine afficiunt; Ionicum melos, quod molli, fractaque modulorum compositione concinnatur, animum emollit, dissoluit, nimisque hilarem vsque in scurriles, & mimicas saltationes, obscenasque corporis gesticulationes turpiter inducit; harmonicium modulamen asperis, efferatisque modulis rabidos animi exuscitat ardores, atque iram medullitus instigat, denique omnes cordis affectus, & intimi animi sensus, quasi fides sint quædam citharæ fidibus respondent, & sonis ictæ concordibus in consimilem concentum impelluntur. Quare non alienum neque ex nihilo fuit, quod sapientes illi viri harmonicis numeris, & musicæ modis animam constare existimarint, & quemadmodum animæ vocalibus spiramentis sonus exprimitur, ita sonorum modulaminibus animam constari crediderunt. Verumtamen illud nequeo satis adinirari, qua scilicet ratione fiat, ut in re tam exigua, tam inani, tam prope nihili, quàm est tremor crispatis aeris, & frequens commoti spiritus vibramentum, cuius ad tympanum auris vndulata appulsione fit sonus, tantum inesse possit dulcedinis, tam iucunda titillatione animus permulceri, & in re adeo parua, ac tenui tam magnum præberi delinimentum; ad quod olim, opinor, alludens Lutamidas merito respondit cum de eximio musico rogaretur, Magnus

gnus est in re parua delinitor. Sed inter alia plurima, quæ in hoc tenebricoso mortalitatis carcere detenti dispicere non valemus, non videtur hoc præter cœtera præcipuam mereri admirationem, si quidem æquè omnia sunt admirabilia, & dum in hac circumfusa rerum caligine versamur, vita omnis nostra non perpetuus risus, non peremnis illacrimatio, sed perpetuus stupor, & assidua admiratio esse deberet, cumq. omnia ex æquo ignoramus, æquali in omnibus admiratione sollicitari deberemus. Id vero in hac re præcipue admirandum est, quò fieri possit ut quidam reperiantur adeo torpidæ stupiditatis, & ab omni sensu humanitatis abhorrètes, ut eos non secus ac truncos inertes, & saxa inanimata nihil afficiat tam dulce, atque elegans oblectamentum. Scytharum Rex Ateas cum cœteri Ismeniarum cantu stupore attoniti supercilium tollerent, ipse iuravit seriò malle se hinnientem equum audire. Dignum meherculè non regia, & solio, sed præsepibus, & stabulis hominem, & cuius auribus non solum equi hinnitu, sed & asini absonis, exasperatisquè rudibus assiduè interestreperent. At ego paulatim non sentiens longius à proposito abducor: reuertor igitur, vnde discessi. Musica viscerum acerrima vellicatrix, dulcis animæ prurigo, humanissimum sensuum blandimentum, mentis penetrabilissimum iaculū, quæ non ut odores, crapulæ libidines, & cœteræ voluptates, nares, ventrem, inguen, brutas animi partes permulcet; sed per aures imò pectori illiquefacta ipsum animum perfundit, quibus illa nisi Mathematicorum studiis elaborata est? Diapason, diapente, diatesseron, cœterasque musicas consonantias fidium certa diuisione elici, numeris definiri modulos, rithmosque omnes, harmonica proportionem temperari, nemo, vel mediocriter in hac arte versatus ignorat: Mercurius, qui Musicæ primus auctor dicitur, idem quoque primus Geometriam fertur inuenisse; hinc igitur aliò me conuertā, & ad thaumaturgicas Mathematicæ machinationes, quò mentem abripi sentio, ipsam quoque transferam orationem. Coniectatis opinor, vel ex ipso nomine quantum polliceatur voluptatis ea Mathematicæ pars, quæ se admirabilium effectricè proficitur:

Neque

neque sanè vos isthæc tacita fallit coniectura . Etenim Thaumaturgica est, quæ festis clamoribus complet theatra, ad cuius opera populus consurgit mirabundus, & geminatis Orchestræ Cuneorumque plausibus proscenia circumsonāt interea dum subitis scenarum varietatibus, vel Aetæræ delapsæ nubes numina deferunt, vel repente tempestas ingruit, vel statim Cælum differenat, vel repentinæ labes telluris huius hiatus inferna claustra referant, vel pegmata ex se surgentia, & tabulata latentibus molitionibus in sublime crescentia, aliaque ex inexpectato producuntur, & furtim abeuntia subducuntur tacitis artibus machinamenta. Eiusdem quoque thaumatopœe artificii structura Archites, fecit Columbam, Vulcanus, seu Dædalus Statuas, & Caius Curio duo illa Theatra asseribus contabulata ædificauit, quæ duobus innixa cardinibus ad leuissima quæque momenta ita facilè nutanti, mobilique examine librabantur, vt ei quandocunque visum fuerat diductis in contraria frontibus matutinis ludicris spectandis inuicem auersa contorqueri, vel subitò conuersa extremis coëuntibus curuaturis in Amphiteatrum commissa gladiatorum caueam circumcludere possent, & nouo spectaculi genere pensilem Romam circumferre . Quid iam Naturæ ipsius suprema potestas reliquum habet, quo inexuperabiles vires explicare, non imitandas arduorum operum difficultates, nec exantlandos mortalium animos labores commoliri inceptet, si vsquæ processere humani ingenij audacissima facinora, vt sphaerarum cælestium conuersiones vitreis orbibus referre tentauerit Archimedes, & mundanæ molis circumuectationem ligneis theatris Curio voluerit imitari? Credo cælum quoque ipsum circumageremus, nisi locus magis deesset, quàm ingenium: vastiores orbe nostro animos gestamus, non licet ingentes spiritus laxare, nimis in angustum compellimur, sed interim in his, quibus includimur angustijs mentem, vt cumque possumus, versamus . Si stellarum globos in vertiginem concitare non permittitur, & super axe, & polis orbem vniuersum circumrotare, at saltem potissimam Orbis partem Romanum popu-

populum vniuersum binis fultum cardinibus circumtorquemus ; quæ sanè diuinis proximè accedentia viribus miracula vni Mathematicæ studio, vt vidistis, acceptum referre nos debemus. Nunc ad illud non operosioris, sed hilarioris voluptatis genus accedamus, quod Pneumaticorum, vel Spiritualium artifex Mathematica nobis excudit : aeris enim compressionibus, aut laxamentis, & vacui, plenique vicissitudine vehementiam spiritus in aquarum expressiones, & in varias actuosi operis oblectationes compellit. In hortorum amœnitatibus inter tonsiles arbusculas, & topiaria opera, quam pulchrè oculos capiunt, animumque recreant spiritus impulsu è fistulis eiacularæ lymphæ, & pneumaticis rationibus expressi fontium latices, quibus modo erumpentibus, modò vi interclusis mira efficiuntur, & mistæ Ars, & Natura innumeris modis argutissimè ludunt. Irrorationes, adspergines, imbres, irides, æstus, procellulæ, murmura, gurgites vortices : præterea tubarum clangores, auium garritus, sibila serpentum, & talia plurima fiunt, quæ aquarum pondere, decursu, obluentis animæ nisu vel propellente, vel repellente, & pertubulorum spiracula concepti flaminis expiratione oriuntur. Syphonem, Diabeten, Pyulcum, pneumatica esse instrumenta, neminem fugit. Memnonis, aut Sesostris statua, quæ quotidie prima luce cantu quodam exorientem diem salutabat huius artis spiritu animabatur. Cleopatæ nauis, quæ argenteis acta remis singulis remigum impulsibus per angusta remorum foramina crebris spiraminibus suauissimum melos exprimebat, non nisi pneumatico artificio post remorum ictus sonum illum funditabat : prætereo innumeras huius generis elegantissimas voluptates, quoniam vulgatæ iam sunt, & quotidie in regalibus palatijs, villisque suburbanis sub concinnatitijs, & voluptarijs specuum horroribus ad æstiuas Principum delicias factitantur : sed istæc quiesculæ sunt, & quædam veluti ludibundæ Mathematicæ nugamenta. Cælestes illas, ac serias Astronomiæ voluptates consideremus, quibus proximè ipsam diuinitatem attingimus, ac velut è propinquo mundi

apicem intuemur, & adhuc mortales immortalia tractamus. Astronomicæ speculationis curriculo Aethræ transcendimus, & per Cæli plagas animo peregrinantes ex ipsa calorū immensitate, temporū annua mutabilitate, diei, noctisque vice, constanti syderum lege, stabili rerum varietate, perenni orbium firmitate, atque inconcussa mundanæ machinæ ardua compaginatione ad ipsum vniuersi summum artificem, ac præpotentem cunctarum rerum moderatorem contemplando euehimur. Assueti porrò Astronomi immensa cælorum æquora transmittere, flocci fermè faciunt quævis ignota maria transnatare: quapropter Astronomia duce ultra liberi patris trophæa penetrauimus, occiduas Gades, & Herculei laboris terminos præternauigauimus: intentatum humanæ experientiæ pelagus, inagitatam remis antea vastitatem, transfretauius, & ratibus quietas sedes perturbauimus Amphitrites, nouumque orbem orbi aperientes naturam penè ipsam expugnauius, & rerum, ac gentium inaudita nouitate non solum vitæ commoda vehementer auximus, sed ignotos mirati cultus, ac formas animū inexplicabili voluptate cumulauimus. Hactenus ergo Aud. Mathematicarū laudes maximè insignes enumerauimus, quarū sūma, & cōsecraria claufula ea est, Mathematicam vbique esse vel necessariam, vel opportunam, vel iucundam; Artes omnes, atque hominū studia omnia è latissimo Mathematicæ sinu diffundi; tellurē, maria, cælum, Mathematicæ viribus debellari, & nihil postremò esse, vel agi, vel excogitari posse nisi Mathematica præsit, vel intersit. Sed quamquam hæc laudes præstantissimæ sunt, ego tamen alio quodam præclaro genere laudis Mathematicam condecorabo, quod sanè quin illis omnibus antecellat neminem vestrum arbitror dubitaturum. Homo non quia ædificat, mercatur, canit, pingit, navigat, sed quia ratione utitur homo est. Si qua igitur ars principem hanc hominis partem excolit illa verè hominem instituit, ac meliorem reddit, & illi vni maximè debemus, nam perfectæ ratione cuncta exequimur, & menti rectè institutæ cætera omnia substernuntur,

etur, ac morigeris obsequijs obsecundant. Quod cum ita sit meritò Mathematica ambabus manibus in cælum extollenda, quoniam sola ratiocinantis animæ magistra intellectuum core, & ingenij regula dirigit hominum intelligentiam, nè à veritate declinet, & id maximè operam dat, vt ad vnguem exactæ dissertationes conficiantur, & cohærentibus, aptèque inter se colligatis consecutionibus propositum concludatur. Quamuis autem Mathematica solum circa triacula, quadrata, circulos, & rerum figuras ratiocinationes pertexere videatur; dico tamen nos interim vna opera addiscere, quomodo in cæteris etiam rebus rationesnectere, illarum momenta perpendere, & rectè argumentando rem propositam elicere debeamus. Cytharædus dum vnā aliquā cantilenam fidibus rectè canere discit, non id vnum, cui maximè studet, & præsentem impendit operam, acquirit, sed aures morosiores reddens, & ad fidium frequentamenta, clarosque repercussus digitos condocesciens, etiam in quauis alia cantilena præanem citare, vel modulos expeditè concidere discit, & probum nactus aurium iudicium, atque articulorum agilem dexteritatem, quælibet rectè modulari, & cytharam rectè vbicunque pulsare perdiscit. Pictor, qui nihil vnquam aliud, nisi hominum vultus, & corpora lineis diligenter exprimere laborauerit; is etiam si collibuerit, Peruanas plantas, Nili hippopotamos, & quæcunque Aphricana mostra licet eius antea oculis incognita, linearum ductibus ad simillimam speciem, repræsentabit: quamuis enim humanas tantum formas antea delinearet, interim tamen non illas tantum, sed quæcunque mole prædita, & quaqua versus extantia in plano describere perdiscebat. Ita planè Mathematicus dum sua schemata ruminatur, & aliquid veri concoquit, non solum in Geometricis perfectas vndique, & numeris omnibus absolutas argumentationes construit, sed ita ingenium corrigit, vim intellectiōis castigat, mentis contentionem exacuit, & ratiocinatricem animam insuefacit, instruit, & conformat, vt super quauis alia re possit sine lapsu disserere, pro certis certa,

affirmet, dubia in medio relinquat, & in vtrinque verissimilibus lubricum assensum sustineat semper attentè circumspiciens, ne falsa pro veris, vt Ixion pro Iunone nebulas complectatur. Quamobrem veteres omnes Philosophi ad sapientiæ studium (quod totum est mentis, & rationis opus) neminem admittebant, nisi ante in Mathematicis versatus fuisset; & olim cum quidam, qui nondum apud Mathematicum ingenij rudimenta posuerat, ad Xenocratis Philosophi gymnasium ventitaret, abi, inquit, Xenocrates, non habes ansam Philosophiæ, nec apud me vellus maceratur. At contra hodie Mathematicorum loco, nescio quas logicas gerras, & distinctionum formulas adolescentuli docentur, quibus fideliter memoriæ commissis, quoties occasio tulerit ad omnia velut exemptilibus emblematis illico vtuntur. Atque hisce friuolis argutijs infarcti, subornatique pueri in exedris, templorumque cathedris philosophia repuerascente inter se ex condicito coludunt, & quod ridiculum magis, & stomachosum est magnis virorum principum auribus circa arrectis, & populo compressis labris obstupescente natiæ illæ, insulsæque inanitæ tergemino plausu excipiuntur; Cæterum puer ille qui è suggesto fringillat, nihilo plus intelligit sua verba quam cithara audiat suum sonum; vt non ineptè illi dixeris quod quidam dixit macræ lusciniæ postquam plumas reuulsit, Tu quidem vox es præterea nihil. Inde ergo fit, vt ex his nostratibus philologiæ non philosophiæ seminarijs adolescentuli florem ingenij in pappos emittant, & grandiores facti primum inperuicacissimos locutuleios, & linguacillimos Gerrones euadant, quippe scientiam verba putantes vt lucum ligna, præoptant verborum flumina quam mentis guttam, atque his mundi cymbalis quotidie fora, compita, triuia perstrepunt, dum tricarum griphorumque perplexitatibus se mutuo implicantes, & versipelli tergiuersatione altercantes, aut decoctorum more, qui versuras versuris soluunt, distinctiones distinctionibus tuentes captiosisque argutationibus contendentes nihil disputando veri exprimunt, sed vt quondam dixit Democritus

nax Cynicus, alter hircum mulget, alter supponit cribrum. Vbi
 verò prolixior barba siluescens mentum conuestiuit, & ipso
 quoque horrido aspectu philosophicam auctoritatem appro-
 barunt, fiunt insolentissimi Brachmanes, & iam non amplius
 verba, sed oracula fundere sibi videntur, atque arrogantius
 Gorgia ad quamcumque quæstionem sine hæsitatione subito
 respondent: Si quid autem contra hiscere ausis, statim cerbe-
 reis latratibus omnia complent, ac velut pro focis & laribus
 depugnandum sit obstinatissimis animis obluantur, & se po-
 tiùs vt Marsias excoriari, quam sibi fibris inhærentem senten-
 tiam eradicari paterentur. Contra verò philosophi mathema-
 tici non se ira, quæ artem perturbat, vt Pyrrus aiebat transuer-
 sos abripi sinunt, sed totos se rationi permittunt, non obstinatè
 refractarij iurgijs & conuicijs inuehuntur, sed pacatis sedatifi-
 que mentibus rem perpendunt, & in obscuris pœnitulque abdi-
 tis afferunt potiùs ingenuam ignorationis confessionem, quam
 temerariam affirmationem; & quia veritatis studio (vt decet)
 non popularis auræ captandæ gratia philosophantur, idcirco
 sui compotes moderati æquanimis tam secum, quàm cum
 alijs differunt, & non solum sine rabie, & sine dolore animi di-
 spurant, sed in suis quæstionibus disquirendis, & in ipsa verita-
 tis peruestigatione maxima voluptate perfruuntur; Quæ quidè
 voluptas vtinā aliquo pacto verbis adumbrari posset; profectò
 ad animos in sui amorem rapiendos nullum potentius philtrum
 Mathematica requireret, sed adeò ipsi rei inest, vt hanc Mathe-
 maticæ voluptatem faciliùs experiri, quàm explicare possimus.
 tam verò singularis & vniùs Mathematicæ propria est, vt nec
 alij voluptati comparata possit declarari.

Neque enim audeant Ganeonum, Helluonumque Epicurei
 greges suis popinæ, & lupanaris spurcissimis fœditatibus huius
 mundissimæ voluptatis puritates comparando temerare. Illæ
 sunt veluti lutulenta porcorum volutabra, hæ verò sunt illiba-
 ta apum roseida violaria: in illis postquam impuri deflagrant
 ardores voluptas expirat, subitque animum ægritudo, in his
 autem non solum post voluptatem nullis pœnitentiæ stimulis

subigimur, sed tunc magis animo gestimus, maior lætitia inualescit, & post compertam veritatem incredibili penè gaudio triumphamus: illæ libidinum voluptates satis quidem violenter in animum dominantur, hæ tamen, quæ è mathematicum studijs, verique indagine percipiuntur animum arctius complexæ, ut iustius ita quoque valentiùs possident. Quis enim scortator adeò veneri se deuouit, atque obstrinxit, ut potitus anica quam deperibat præ gaudio bouem sacrificaret? At Pythagoras postquam celebrem illam propositionem de quadratis trianguli orthogonij diu quæsitam inuenit Musis litauit, & fecit hecatorombem. Quis est vsquam adeò vorax, adeò helluandi audius, ut cupediarum liguritionem vita pacisci non vereatur, & postquam saliaribus cœnarum apparatibus domum ipsam vorauerit, ac vomuerit luculentis culinarum caminis impositus non recuset concremari? At Eudoxus mathematicus, si Soli propior factus illius lucidissimi globi magnitudinem, formam, motum percipere potuisset, post hæc libens, volensq. æternis illis ignibus, ut olim Phaeton se spōtè conflagratūrū offerebat. Quis vnquam vllis alijs voluptatibus vsque adeò se ingurgitauit, ut extra se positus interdū cibū cœperit nec ne ipse nesciat nec reminiscatur? at Nicias opticus sæpè ministros interrogauit pransus ne esset, & Archimedes pueri à sua deletitia tabula vix vi auellebant, & ut lauarent ac vngerent adducebant in balneum, vbi tamen à studio conquiescere non poterat, sed mathematica diagrammata in ventre aut femore strigili ducebat. Quis vnquam adeò ventriculosus gurgulio fuit, ut cibo distentius & nimia voluptate permotus vociferaretur, O populares bene potus bene pastus sum? Quis adeò intemperans amator ut post puellæ noctem elatus gaudio clamet, Concubauī, Compressi, Pernoctauī? At Archimedes, cum in balneum descenderet, ac fortè animaduerneret, quod quantum corporis mersabatur, tantumdem aquæ exundantis effluebat, statim in animum incidit, quomodo furtum aurificis in votiuā corona Hieronis deprehenderet, & repente nudus gaudio tripudians exiit, & domum properans identidem clamitauit, Inueni Inueni.

ni. Quis denique suis voluptatibus (quæcumque demum illæ sint) tam altè demersus, & tanquam trabali clauo ita affixus fuit, vt in illis animam egerit, ac non sentiens hostilibus gladijs fuerit transfuerberatus? At Archimedes in ipso Syracusarum excidio, dum tota vrbs hostili iam exposita crudelitati cæde ac sanguine funestabatur, ita geometricis intentus figuris, sensuque omni illuc applicito vehementer meditabatur, vt nullis aliarum rerum incursionibus animus pulsaretur, & in illa geometrica speculatione ab hostibus ante confossus fuerit, quam excitatus, & prius ferrum iugulo, quam sonitum auribus acceperit. Oh vim Geometriæ maximam, incredibilem, singularem. Syracusana in vrbe hostium furor immanissimus debaccabatur: sacra, profanaque omnia victor miles proculcabat: matres, pueri, senes passim promiscua cæde contrucidabantur: gemitus, vociferatio, plantus, fragor, lamentatio, stridor, vlulatus asperum horribilemque concentum permiscebant: templorum direptione, tectorum demolitione, priuatarum publicarumque ædium miseranda euersione tota vrbs ab ipsis concussa fundamentis intremebat, cum tamen vnum hominem ibidem degentem Geometriæ studium ita medullitus occupauerat, ita totum sibi vendicauerat, ita sensus omnes occluserat, vt nec militari clamore, nec domorum labentium, quassatæque vrbs ruina potuerit commoueri. Sed Mathematicum studia hominum animos adeò constrinxisse, & suis adeò voluptatibus obsedisse mirum videri non debet, si (vt olim creditum est) Cœlites quoque ipsi Dijque immortales, quos incorrupta foelicitas, & iugis bonorum omnium copia circumfluit mathematico tamen studio detinentur, & geometricis quæstionibus oblectantur. De lios quondam pestifera lues atrociter profigabat: ad Apollinem itum est consultum quo piaculo posset dirum malum propulsari; responsum ab oraculo est, si Apollinis ara, quæ Cubica erat duplicaretur. Ara igitur æqualis priori aræ superimposita est, nec tamen vis morbi remisit, sed pestis vt antea grassabatur: quare Plato monuit Oraculi vocem non perceptam nec impletam; id enim sibi velle Apollinem non vt cubum cubo

aptarent, & parallelepipedum facerent, sed vt cubus dati cubi
duplus inueniretur, siue duæ mediæ proportionales indagaren-
tur, quibus problema effectum redderetur; adiecit autem
Plato oraculi inuolucro larenter ijs significari, ne impofterum
Mathematicam segniter incuriosèque tractarent, qua ipse
Apollo delectaretur, & cuius vnica soluta quæstione possent à
Dijs aeris etiam redimere salubritatem. Tum verò complures
Geometræ huic contemplationi se dederunt, & Nicomedes
Conchoide, Diocles Cissoide, vel hederacea linea, Me-
nechmus quorundam corporum sectionibus, alijque alijs ratio-
nibus duas medias proportionales quæsiuerunt, & exinde hoc
problema Deliacum nuncuparunt. Verum licet missa faciamus
hæc falsæ antiquitatis fictitia Numina, quibus meritò absurda
fabulamenta eleuant fidem; ipsum nihilominus verissimum Re-
gem superum, verumque omnium conditorem geometram
esse, idem Plato existimauit; interrogatus enim quid rerum
gereret summus Deus, respondit, Mathematicæ operam dat.
Quod verè sapienterque dictum est; Mathematica enim veri-
tatem, necessitatemque excudit, & Deus ipsa rerum veritas ac
necessitas est, naturæque arbiter veritatis ac necessitatis vincu-
lis omnia coercet, atque his adamantinis catenis nexas causa-
rum series in omne æuum producit; Præterea mundana cor-
pora omnia attentè intuentibus diuinam Mathematicam
ostentant, & Deum Archigeometram esse luculentissimè de-
prædicant, vt syderum motus, telluris libratio, plantarum
per fibras graciliter fistulas quasi per diabetem terrestris hu-
moris attractio, & eiusdem per venulas toto trunco & ramis
interspersas ad frondes vsque penetratio, piscium, volucrum,
reptilium natatio, volitatio, reptatio, quibus planè subtilis & la-
tens Mathematica subest; Quin immo in vna hac nostri corpo-
ris structura mirabili, mechanicam omnem supellestem, & in-
strumenta omnia si lubet inecum recognoscite. Non videtis
ossium vestes, artuum trocleas, venarum hydraulica, ner-
uorum ductaria, oculorum optica, pulmonum pneumatica,
mechanicorum machinamenta, quibus possumus vel attolle-
re vel

re vel deprimere, vel reclinare, vel dispandere, vel contrahere corpus; & modo assidere, modo ambulare, modo in genua flecti, modo cervicem vertebratis orbiculatim ossibus flexilem torquere, modo manum nervulorum tractus sequentibus articulis mobilem explicare, aut complicare, & totam denique corporis compagem ut cumque libet commovere, atque agitare, & ad innumeratos propemodum usus adaptare, adiutantibus scilicet mechanicis illis instrumentis, atque organis, quibus cælestis Mathematicus, & in hac omni mundana scena machinarius artifex Deus Opt. Max. nos instruxit. Quos igitur ego laudem cumulos coaceruabo, quibus satis decoris titulorum prærogatiuis Mathematicam cohonestabo, quam vel ipsius Dei studium, artem, curamque præcipuam esse nemo nostrum inficiari potest? Sed præclare mecum agitur Aud. non enim verborum flosculos legere, non Rhetorum myrropolia perscrutari, non pigmenta, non medicamenta stili conquirere habeo ad venustatem orationi comparandam: Hic alienis accersitis, & adscititijs laudibus non est opus: suis ac proprijs abundat laudibus Mathematica, & sinceræ ac liquidæ veritatis amans respuit præconia emendicata. Quare coronidis, & encomij loco satis superque fuerit si Mathematicam suis dumtaxat nominibus appellabo, atque ex omnia quæ actenus probavi, summatim colligens, ac perstringens vobis in memoriam reuocabo. Est enim Mathematica ut vidistis Arcium inuentrix, Humanitatis magistra, Animi excultrix, Pacis bellicque gubernatrix, Iustitiæ dispensatrix, Terrarum dominatrix, Marium domitrix, Cæli expugnatrix, Orbis columen, Diuinitatis specimen, Honestæ voluptatis ministra, Ingeniorum excitatrix, Rationis norma, Philosophiæ Dux; atque potissima Dei cura & studium, ad quod quicumque non intimis usque sensibus stimulatur, non accenditur, non inflammatur, hunc ego arbitror ab humanis diuinisque dotibus abhorrentem, Deo inuisum, nefastum, ac malè feriatum hominem, ab hominibus relegandum, & ad mutas pecudes reijciendum, ultra lethem, infra inferos amandandum, detrudendum, exterminandum. Vos autem

ò lectissimi iuvenes, quorum animis Mathematicæ amor suas
 faces admouit si præclarissimam hanc doctrinam haurire exo-
 ptatis, oro & obtestor non vt genium fraudetis, & in ediam
 toleretis vt Nicias; non vt vos ignibus conflagratos impona-
 tis vt Eudoxus; non vt iugulos hostium mucronibus obijciatis
 quemadmodum Archimedes, sed vt modicos saltem labores
 ne refugiatis. Ego sanè, quantum in me erit vigebo vos, ac
 promouebo, & in meo munere obeundo enitar sedulo, vt ob-
 stinati laboris contentione ingenij mei tenuitas subleuetur.
 Ex altera parte vos operam date, ne per inertiam aut socor-
 diam vestræ egregiæ indoli, parentum, & patriæ votis, merque
 optimæ voluntati iniuriam faciatis, & sedulo cauete ne volu-
 ptas malorum esca vos suis illecebris alio auocet, & Catonia-
 num illud vobiscum deliberare, Breui ne voluptate æterna,
 damna, an breui labore æternas laudes consequi velitis.

Dixi.

L A V S D E O.



Handwritten text, likely a letter or document, written in a cursive script. The text is mostly illegible due to fading and bleed-through from the reverse side. It appears to be a formal or semi-formal communication, possibly a letter of introduction or a business document.

1877

1877

1877



29/10



Angelo * Pandimiglio *



* restauratore *

825660

8274800

